

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON /KANTON SREDIŠNJA BOSNA
KANTONALNI SUD U NOVOM TRAVNIKU
Broj: 49 0 K 056334 21 Kž
Novi Travnik, 06.12.2021. godine

U IME FEDERACIJE BOSNE I HERCEGOVINE!

Kantonalni sud u Novom Travniku u vijeću sastavljenom od sudija: Darmina Avdić, kao predsjednika vijeća, Zuhdije Ćosić i Lazarele Porić, kao članova vijeća, uz sudjelovanje Ivane Ćorić-Žderić kao zapisničara, u krivičnom predmetu protiv optuženog T.M. zbog krivičnog djela Teška krivična djela protiv bezbjednosti javnog saobraćaja iz člana 336. stav 1. u vezi sa članom 332. stav 1. Krivičnog zakona Federacije Bosne i Hercegovine, radi donošenja odluke po žalbi kantonalne tužiteljice u Travniku broj T06 0 KTŽ 0028117 21 od 24.06.2021. godine, protiv presude Općinskog suda u Kiseljaku broj 49 0 K 056334 21 K od 18.05.2021. godine, na sjednici vijeća održanoj dana 06.12.2021. godine, donio je sljedeću

PRESUDU

Žalba kantonalne tužiteljice u Travniku se uvažava i preinačuje se u odluci o kazni presuda Općinskog suda u Kiseljaku broj 49 0 K 056334 21 K od 18.05.2021. godine, tako da se optuženi T.M. za krivično djelo Teška krivična djela protiv bezbjednosti javnog saobraćaja iz člana 336. stav 1. u vezi sa članom 332. stav 1. Krivičnog zakona Federacije Bosne i Hercegovine, za koje je tom presudom oglašen krivim, osuđuje na kaznu zatvora u trajanju od 6 (šest) mjeseci.

U ostalom dijelu prvostepena presuda ostaje neizmijenjena.

Obrazloženje

Presudom Općinskog suda u Kiseljaku broj 49 0 K 056334 21 K od 18.05.2021. godine, optuženi T.M. (u daljem dijelu: optuženi) oglašen je krivim za krivično djelo Teška krivična djela protiv bezbjednosti javnog saobraćaja iz člana 336. stav 1. u vezi sa članom 332. stav 1. Krivičnog zakona Federacije Bosne i Hercegovine (u daljem dijelu: KZ FBiH), činjenično opisano u izreci te presude, za koje je temeljem tog propisa i po članu 42., 43. i 49. KZ FBiH, osuđen na kaznu zatvora u trajanju od 2 (dva) mjeseca. Istom presudom po članu 77. KZ FBiH izrečena mu je mjera bezbjednosti zabrane upravljanja motornim vozilom „B“ kategorije u trajanju od 6 (šest) mjeseci, a po članu 202. stav 1. Zakona o krivičnom postupku Federacije Bosne i Hercegovine (u daljem dijelu: ZKP FBiH) optuženi je obavezan da naknadi troškove krivičnog postupka u iznosu od 370,00 (tristosedamdeset) KM i sudu paušal u iznosu od 70,00 (sedamdeset) KM u roku od 30 dana, po pravomoćnosti presude, dok su po članu 212 stav 3. ZKP FBiH, oštećeni M.K. i I.V. s imovinskopравnim zahtjevom upućeni na parnicu.

Protiv te presude u zakonskom roku, žalbu je izjavila kantonalna tužiteljica u Travniku (u daljem dijelu: tužiteljica), koja žalbom prvostepenu presudu pobija zbog odluke o krivičnopravnoj sankciji, s prijedlogom da se pobijana presuda preinači tako da se optuženom izrekne kazna zatvora u dužem vremenskom trajanju, u kojoj nije traženo da budu obaviješteni o sjednici vijeća.

Odgovor na izjavljenu žalbu podnio je optuženi, kojim osporava žalbene prigovore i predlaže da se žalba odbije kao neosnovana, u kojem nije traženo da bude obaviješten o sjednici vijeća.

Na sjednici vijeća ovog suda održanoj u skladu sa članom 319. stav 8. ZKP FBiH, u odsustvu stranaka, jer u žalbi i odgovoru na žalbu nije traženo da budu obaviješteni o sjednici vijeća, nakon što je ovaj sud ispitao pobijanu presudu u granicama žalbenih prigovora, u smislu člana 321. ZKP FBiH, a po službenoj dužnosti da li je na štetu optuženog povrijeđen krivični zakon, odlučio je kao u izreci iz sljedećih razloga:

Ispitujući prvostepenu presudu po službenoj dužnosti da li je na štetu optuženog povrijeđen krivični zakon, ovaj sud utvrđuje da to u konkretnom nije slučaj, jer je prvostepeni sud pravilno postupio kada je radnje iz izreke pobijane presude, pravno okvalifikovao kao krivično djelo Teška krivična djela protiv bezbjednosti javnog saobraćaja iz člana 336. stav 1. u vezi sa članom 332. stav 1. KZ FBiH.

Ispitujući pobijanu presudu u odluci o krivičnopravnoj sankciji u vezi žalbe tužiteljice, po mišljenju ovog suda, pravilno žalba tužiteljice ukazuje da izrečena krivičnopravna sankcija kazna zatvora od dva mjeseca, koja je izrečena pobijanom presudom, nije adekvatna težini počinjenog djela i njegovim štetnim posljedicama, kao i da se njome neće postići ni opća ni posebna svrha kažnjavanja, pogotovo ako se ima u vidu da je djelo počinjeno u alkoholiziranom stanju. Naime, ovaj sud smatra da prvostepeni sud prilikom izricanja krivičnopravne sankcije u konkretnom slučaju, nije u dovoljnoj mjeri cijenio otežavajuće okolnosti, činjenicu da je djelo učinio sa većom koncentracijom alkohola u krvi ta da je u prometnoj nezgodi ugrožen život dvije osobe pri čemu je jedna osoba zadobila opisane teške tjelesne povrede, a druga osoba lake tjelesne povrede. Upravo zbog toga, a imajući posebno u vidu i spomenutu težinu počinjenog djela i njegove štetne posljedice, kao i jačinu povrede zaštićenog dobra, o čemu se moralo voditi računa prilikom izricanja krivičnopravne sankcije, bez obzira na navedene olakšavajuće okolnosti u pobijanoj presudi koje ni žalbom nisu dovedene u sumnju. Dakle, prvostepeni sud nije dao adekvatan značaj ovim otežavajućim okolnostima, na koje ukazuje žalba tužiteljice, u kom smislu i ovaj sud smatra da se izrečenom kaznom zatvora od dva mjeseca, neće izraziti društvena osuda, niti postići svrha kažnjavanja, a pogotovo imajući u vidu učestalost ove vrste krivičnih djela, ne samo na prostoru ovog Kantona nego i cijele BiH. Zbog toga je uvažavanjem te žalbe preinačio pobijanu presudu, pa je optuženom izrekao minimalnu propisanu kaznu zatvora za počinjeno krivično djelo u trajanju od šest mjeseci, koju smatra adekvatnom i primjerenom prirodi i težini počinjenog krivičnog djela, njegovim štetnim posljedicama, jačini povrede zaštićenog dobra, okolnostima izvršenja počinjenog djela, te da se u konkretnom slučaju, jedino takvom kaznom može ostvariti, ne samo opća, nego i posebna, svrha kažnjavanja iz člana 7. i 42. KZ FBiH..

Sa izloženog, valjalo je po članu 329. stav 1. ZKP FBiH, odlučiti kao u izreci.

Zapisničar
Ivana Čorić-Žderić,s.r.

Predsjednik vijeća
Darmin Avdić,s.r.